

**Nunaoil A/S pillugu Inatsisartut Inatsisissaattut siunnersuut**

Inuussutissarsiornermut Aatsitassanullu Naalakkersuisoq

**Saqqummiussaq**

(Inuussutissarsiornermut Aatsitassanullu Naalakkersuisoq)

**Siullermeerneqarnera**

Kalaallit Nunaanni namminersorneq pillugu kalaallit-danskit namminersorneq pillugu isumalioqatigiit isumaliutissiissutaannut atatillugu, kiisalu tassani Kalaallit Nunaanni Namminersorneq pillugu Inatsimmut missiliummi tunniunneqartumi isumaqatigiissutigineqarpoq, Kalaallit Nunaanni Namminersorneq pillugu Inatsisip atuutilerana ilutigalugu Naalagaaffiup Nunaoil A/S-imi aktiaatai Namminersorlutik Oqartussat pisiarissagaat.

Tamanna tunngavigalugu Naalagaaffiup Nunaoil A/S-imi aktiaatai 21. juni 2009 Namminersorlutik Oqartussat pisiaraat.

Nunaoil A/S siusinnerusukkut danskit inatsisaannut aamma Kalaallit Nunaanni inatsisartut inatsisaannut atatinneqarluni najoqqutaqarsimavoq, tamatumunngalu peqquataavoq Namminersorerullutik Oqartussat aamma Naalagaaffiup Nunaoil A/S-ip aktiaataannik tamarmik immikkut 50%-inik pigisaqarnerat. Naalagaaffiup Nunaoil A/S-imi aktiaataanik Namminersorlutik Oqartussat pisiarinninneranni, taamaalillunilu tamakkiisumik piginnittuulluni akisussaalernerani danskit inatsisaat najoqqutarissallugit pisariaqarunnaarput. Taamaammat Nunaoil A/S pillugu inatsit, tak. inatsisitigut nalunaarut nr. 87 ulloq 9. februar 1999-imeersoq, Kalaallit Nunaanni ikummatissanik il.il. ingerlatanik selskabimik isumaginnittussamik pilersitsineq, Kalaallit Nunaanni Namminersorneq pillugu Inatsimmi § 26-mi aalajangersakkat aqqutigalugit atorunnaarpoq.

Taamaattumik Nunaoil A/S pillugu Inatsisartut Inatsisissaattut siunnersuutip siunertaraa piginnittutut nutaamik inissisimanermit inatsisip naleqqussarneqarnissaa. Taamaalilluni Nunaoil A/S namminersortutut aktieselskabiulluni suliarinnittutut ingerlaannassaaq immikkut ilisimasalinnik siulersuisoqarluni Namminersorlutik Oqartussat kisimiillutik piginnittutut atuutsitaannik.

Taamaammat siunnersuutip erseqqissarpaa Namminersorlutik Oqartussat Kalaallit Nunaanni ikummatissanik akuersissutinut peqataanerisa Nunaoil A/S-ip isumagissagaa, kiisalu suliassat pissusissamisoortumik tamatumunnga attuumassuteqartut isumagissallugit.

Aalajangersarneqarpoq Namminersorlutik Oqartussat Naalakkersuisut ataanni aktiaatinik piginnittuusut, taamaattorli aalajangiisoqarsinnaalluni, aktieselskabimut ataatsimut arlalinnuunniit, Namminersorlutik Oqartussat kisimiillutik piginnittuuffigisaannut, aktianik tunniussisoqarsinnaasoq imaluunniit aktianik nutaanik pisinissamut periarfissiisoqarsinnaalluni.

Siunnersuummi aamma erseqqissaatigineqarpoq Naalakkersuisut aamma Nunaoil A/S Inatsisartunut ilisimatitsissuteqartarnissaminnut pissusaaffeqartitaasut.

Ilisimatitsissutigisartagassat ilaat pillugit aalajangerneqarpoq, paasissutissat tamakku ilaat isertuunneqartariaqartarsinnaasut, tamatumunnga peqqutaalluni Nunaoil A/S inatsisitigut illersorneqarnermi atugassarititaasut tunngavigalugit namminersorluni ingerlatsisutut suliarinnissinnaasariaqarmat.

Taama oqaaseqaateqarlunga siunnersuut Inatsisartunut suliassanngortippara.